

इवनिंग डोगरी न्यूज़ बुलेटिन

समे .18:15 Hrs

<><><><><><>

Headlines

1. गृह मंत्री अमित शाह होरें अज्ज राज्यसभा च आखेआ ऐ जे एनडीए सरकार दे कार्यकाल दरान जम्मू-कश्मीर च आतंकवाद करी होई दिऐं मौतें च 70 फीसद दी कमी दर्ज कीती गई ऐ।
2. मुखमन्त्री उमर अब्दुल्ला होरें आखेआ ऐ जे सरकार मुबारक मंडी आहले मैहल सने जम्मू-कश्मीर दिऐं महत्वपूर्ण विरासती थाहरें दी परानी शान परतियें ब्हाल करने लेई बचने बज्झी दी ऐ।
3. जम्मू-कश्मीर होईकोर्ट नै विधानसभा च 5 विधायकें गी नामजद करने दे लेफ्टिनेंट गवर्नर हुंदे अखितयारें गी चुनौती देने आहली जनहित याचिका पर खीरी सुनवाई लेई 30 अप्रैल दी तरीक मुकर्रर कीती ऐ।
4. केंद्र सरकार आसेआ जम्मू-कश्मीर च 41 ज्हार 735 करोड़ रुपें दी लागत कन्नै राश्ट्री जरनैली शिड़कें सरबन्धी 47 परियोजनाएं दा निर्माण करोआया जा'रदा ऐ।
5. जम्मू-कश्मीर ते लद्दाख केंद्र शासित प्रदेशें गी जरनैली शिड़कें दे रख-रखाs लेई माली ब'रे 2024-25 दरान 81 करोड़ रुपे बागुजार होए न।

<><><><><><>

Amit-Shah JK

गृह मंत्री अमित शाह होरें दफा 370 हटने दे बाद जम्मू-कश्मीर च आई दिऐं सकारात्मक तब्दीलिएं पर अज्ज लोs पाई। गृह मंत्रालय दे कम्मकाज बारें राज्यसभा च जारी चर्चा दा परता दिंदे होई गृह मंत्री होरें दस्सेआ जे एनडीए सरकार दे कार्यकाल दरान जम्मू-कश्मीर च आतंकवाद करी होई दिऐं मौतें च 70 फीसद दी कमी दर्ज कीती गई ऐ ते एहदे कन्नो-कन्नी हिंसा ते गड़बड़िएं च बी खरी मती कमी आई ऐ। श्री शाह होरें आखेआ जे प्रधानमंत्री होरें आतंकवाद गी बिंद बी बर्दाश्त नेई करने दी नीति अपनाई दी ऐ ते एहदी बदौलत खिते च सुरक्षा स्थिति च सुधार दे कन्नो-कन्नी रमानदारी बी ब्हाल होई ऐ। इस बारें बोलदे होई उनें आखेआ।

गृह मंत्री होरें जम्मू-कश्मीर च होए दे महत्वपूर्ण विकास कम्में पर बी लोs पाई। रास-पूंजी बारें बोलदे होई उनें आखेआ जे खिते च बड़ा मता निवेश होआ ऐ जिन्नै आर्थिक विकास ते रोजगार दे खेतर च जोगदान दिंदे होई समूलचे खिते दी समाजी-आर्थिक दशा च सुधार आहन्नेआ ऐ। उनें आखेआ।

गृह मंत्री होरें जम्मू-कश्मीर च होए दे महत्वपूर्ण समाजी ते सियासी सुधारें पर बी लोs पाई। श्री शाह होरें डोगरी, हिंदी ते उर्दू गी सरकारी भाशाएं दे तौर पर मान्यता देने सने महिलाएं, दलितें, जनजातियें ते बच्चें दे अधिकारें दी हिफाजत लेई राश्ट्री कन्नूनें दी अमल आवरी दा बी जिक्र कीता। उनें आखेआ।

<><><><><><>

CM-Mubarak Mandi

मुख्यमंत्री उमर अब्दुल्ला होंरें आखेआ ऐ जे विरासत दी परतियै बहाली संरक्षण शा बी मती अहमियत रखदी ऐ। उनें आखेआ जे एह परम्पराएं च नमी जान भरने, पंछान गी सुरक्षा देने ते एह निश्चित करदी ऐ जे सांस्कृतिक विरासत गी औने आहली पीढ़ियें आस्तै कायम रखेआ जाग। उमर अब्दुल्ला होंरें आखेआ जे मुबारकमंडी शड़ा इक्क महल गै नेई ऐ, सगुआं एह जम्मू दे दिल दी धड़कन ऐ। उनें आखेआ जे मुबारकमंडी दी परतियै बहाली च भाएं चिर लगगा करदा ऐ पर सरकार एहदी पुरानी पंछान गी बहाल करने लेई बचनबद्ध ऐ। इस मौके पर बोलदे होई मुख्यमंत्री उमर अब्दुल्ला होंरें आखेआ।

<><><><><><>

LG-PIL

जम्मू-कश्मीर हाईकोर्ट नै प्रदेश दी विधानसभा च 5 विधायकें गी नामजद करने दे लेफ्टिनेंट गवर्नर हुंदे अखितयारें गी चुनौती देने आहली जनहित याचिका पर खीरी सुनवाई लेई 30 अप्रैल दी तरीक मुकर्रर कीती ऐ। साबका एमएलसी ते जम्मू-कश्मीर प्रदेश कांग्रेस कमेटी दे मुख प्रवक्ता एडवोकेट रविंद्र शर्मा हुंदे आसेआ दायर कीती गेदी इस जनहित याचिका च जम्मू-कश्मीर दे परतियै गठन सरबन्धी कनून 2019 तैहत इनें नामजदगिएं गी संवैधानिक वैधता गी लेइयै सोआल पुट्टे गेदे न। इस कनून दी संशोधित कीती गेदी दफा-15 दे तैहत एल.जी होर 5 मैम्बरें गी विधानसभा लेई नामजद करी सकदे न जिंदे च 2 महिलां, 2 कश्मीरी पंडत ते 1 पी.ओ.जे.के यानि मकबूजा जम्मू-कश्मीर दा बसनीक होग ते इन्दे कश मतदान सने ओकड़े सब्भै अखितयार होडन जेड़े होरनें विधायकें कश न।

<><><><><><>

Highway-Projects

शिड़क, ट्रांसपोर्ट ते जरनैली शिड़कें सरबन्धी केंद्री मंत्रालय नै आखेआ ऐ जे जम्मू-कश्मीर च 41 जहार 735 करोड़ रुपें दी लागत आहली 810 किलोमीटर लम्मी जरनैली शिड़कें सरबन्धी 47 परियोजनां एल्लै जेरे-तामीर न। जारी आंकड़ें मूजब जम्मू-कश्मीर ओकड़े महत्वपूर्ण खितें च शुमार ऐ जिनें गी केंद्र सरकार दी जरनैली शिड़कें दे बाददे विस्तार आहली योजना दा सब्भनें शा मता लाह हासल होआ ऐ। जम्मू-कश्मीर च जित्थे 2014 च राष्ट्री जरनैली शिड़कें सरबन्धी नेटवर्क 91 जहार 287 किलोमीटर हा उत्थे गै 2025 च एह बधियै 1 लक्ख 46 जहार 204 किलोमीटर होई गेदा ऐ। सरकार दा मकसद संपर्क सरिस्ते च सुधार करना, बपार कारोबार च बाददा करना ते दूर-दरेडे इलाकें तगर पूरे बरे पुज्ज यकीनी बनाना ऐ।

<><><><><><>

J&K STMC-PBMC

भारत सरकारै माली बरे 2024-25 दरान जम्मू-कश्मीर ते लद्दाख च राष्ट्रीय जरनैली शिड़कें दे रख-रखास लेई 81 करोड़ रुपे बागुजार कीते न। शिड़क, ट्रांसपोर्ट ते जरनैली शिड़कें सरबन्धी केंद्री मंत्रालय आसेआ जारी कीते गेदे आंकड़ें मूजब, जम्मू-कश्मीरगी राष्ट्रीय जरनैली शिड़क दे 96 किलोमीटर हिस्से पर लौहकी अवधि आहले रख-रखास मतल्लक ठेके लेई 34 करोड़ रुपे ते 28 किलोमीटर हिस्से प कारकरदगी आधारित रख-रखास ठेके लेई 37 करोड़ रुपें दी रकम बागुजार कीती गेई ऐ। इस्सै चाल्ली लद्दाख गी लौहकी अवधि आहले रख-रखास ठेके तैहत 6 किलोमीटर जरनैल शिड़क दे रख-रखास लेई 10 करोड़ रुपे दिते गे जिस्सलै के कारकरदगी आधारित रख-रखास ठेके तैहत लद्दाख लेई इस बरे कोई प्रोजेक्ट मंजूर नेई कीता गेआ।

<><><><><><>

Martyr Day

शहीद हवलदार राकेश कुमार हुंदा 17मां शहीदी ध्याड़ा अज्ज साम्बा जिले दे उन्दे जद्दी गांs जरूएं च मनाया गेआ। इस मौके पर सेना आसेआ गार्ड ऑफ आनर दिता गेआ ते परिवार दे सदस्यें, रिश्तेदारें, मकामी लोकें ते पुलस अधिकारियें आसेआ श्रद्धांजलि भेंट कीती गई। गौरतलब ऐ जे शहीद राकेश कुमार होरें देश दी सुरक्षा खातिर 21 मार्च 2009 गी कश्मीर घाटी दे कुपवाड़ा इलाके च अपना बलिदान दिता हा। उ'नेंगी उन्दी बहादुरी लेई मरणोपरांत शौर्य चक्र कन्नै सम्मानित कीता गेआ हा। आकाशवाणी जम्मू कन्नै गल्ल करदे होई शहीद राकेश कुमार हुंदी घरै आहली नै आखेआ।

<><><><><><>

Bhaderwah-Football

नशामुक्त भारत अभियान च युवाएं दी भागीदारी गी बढ़ावा देने आस्तै डोडा पुलस नै भद्रवाह दे पी.जी कालेज ग्राउंड च इक्क फुटबाल टूर्नामेंट दा सरिस्ता कीता। टूर्नामेंट दे उद्घाटनी समारोह च सीनियर पुलस अधिकारी ते मन्ने-परमन्ने दे मुकामी लोक शामिल होए। नशाखोरी बारै जागरूकता फैलाना ते नौजवानें दी खेड़ें च भागीदारी गी बढ़ाना गै इस टूर्नामेंट दा अहम मकसद ऐ। एसएसपी डोडा संदीप मेहता ते एसपी भद्रवाह विनोद शर्मा होरें टूर्नामेंट दा उद्घाटन कीता। इस मौके पर बोलदे होई एसएसपी डोडा संदीप मेहता होरें आखेआ।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 30 मार्च गी देश विदेश च रौहने आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 120मीं किश्त होग। कार्यक्रम च शामिल करने लेई लोक अपने बचार ते सुझाह 28 तरीक तगर टोल फ्री नंबर 1800-11-7800 पर भेजी सकदे न। एहदे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नी एहदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग। एहदा डोगरी अनुवाद तुस रातीं 8 बजे इक बारी परतियै सुनी सकदे ओ।

<><><><><><>